

蘇學士集

冊一

卷之十

蘇學士集

【目錄】

四部備要

集部

上海中華書局據宋氏校

刻本校刊

桐鄉

陸費逵總勘

杭縣

高時顯輯校

杭縣

吳汝霖校

丁輔之監造

蘇子美文集序

予宦遊吳門得宋蘇子美滄浪亭遺址於荒煙蔓草中稍稍爲之起廢墜葺垣屋數年以來亭之樹石若歲益而古嘉花名卉若月益而娟妍而吳之人雅好事春秋佳日遊屐麇集遂擅郡中名勝我輩馮弔古蹟履其地則思其人思其人則必慨想其生平求其文章詞翰以髣髴其萬一蓋尙友之道然耳子美故有集若干卷久傳於世惜板已毀世之獲見其集者蓋少予幸得是本而卒業焉子美詩磊落自喜文章雄健負奇氣如其爲人以之妃晁儷張殆無媿色顧晁張繼起於古學大盛之日而子美獨崛興於舉世不爲之時挽楊劉之頽波導歐蘇之前驅其才識尤有過人者學者論宋初古文往往以子美與穆伯長並稱其實伯長不及也吳門徐子七來年少嗜古偕兄念修重爲開雕將欲與予之滄浪小志並廣其傳予喜亟取是集付之書成請予序予曰昔歐陽公言之矣歐陽之序蘇氏文集曰子

美齒少於予而予學古文反在其後又曰斯文金玉也棄擲埋沒糞
土不能銷蝕其見遺於一時必有收而寶之於後世者嗚呼詎不有
待於今日與康熙戊寅八月之朔滄浪寓公宋瑩序

大中丞宋公命復校子美集讀之數日而乃恍然於公之重修滄浪亭之意也始亭之修也不知者以爲政有餘暇僅以供遊覽也其知者以爲愛慕其才不忍使其遺蹟之泯沒無傳也而公之意則大不然夫子美抱經世之學懷忠君之心觀其所爲詩文及論時事劄子雖未見諸實事然其議論侃侃慷慨切直皆有關于社稷生民之故能言人之所不敢言不可以區區文人才士目之矣使當日天子宰相知其賢而大用之殆無難澤被一世名垂於後而惜乎其以酒食之過至遷謫以死徒使後之人憑弔遺蹤爲之拊膺歎恨于九原之不可復作不大可惜哉公重其學問心術而惜其見棄于當時之君相又憫其亭之廢而不存是以修之也夫子美慶曆人也自慶曆迄今垂六七百年已無有過而問之者儻更歷幾百年其詩文必散失而無傳而所謂滄浪故址者亦且銷滅於榛莽之中而不可考將并不知子美爲何如人豈復有新其亭而珍其遺集者乎雖其生平行

事略備宋史而所載之文僅二三首苟不睹全集卒無由論其世知
其人則世亦不過與文苑諸人同類稱之而止矣此公既修其亭而
又命復校其集之意也昔歐陽永叔序其集云凡人之情忽近而貴
遠子美屈於今世猶若此其伸於後世宜如何也其猶此志歟復既
承公命因與兄念修次第校之而付諸剞氏

康熙戊寅臯月下澣震澤徐惇復書于白華書屋

蘇學士文集原序

予友蘇子美之亡後四年始得其平生文章遺稿於太子太傅杜公之家而集錄之以爲十五卷子美杜氏壻也遂以其集歸之而告於公曰斯文金玉也棄擲埋沒糞土不能銷蝕其見遺於一時必有收而寶之於後世者雖其埋沒而未出其精氣光怪已能常自發見而物亦不能揜也故方其擯折摧挫流離窮厄之時文章已自行於天下雖其怨家仇人及嘗能出力而擠之死者至其文章則不能少毀而揜蔽之也凡人之情忽近而貴遠子美屈於今世猶若此其伸於後世宜如何也公其可無恨予嘗考前世文章政理之盛衰而怪唐太宗致治幾乎三王之盛而文章不能革五代之餘習後百有餘年韓李之徒出然後元和之文始復于古唐衰兵亂又百餘年而聖宋興天下一定晏然無事又幾百年而古文始盛於今自古治時少而亂時多幸時治矣文章或不能純粹或遲久而不相及何其難之若

是歟豈非難得其人歟苟一有其人又幸而及出於治世世其可不爲之貴重而愛惜之歟嗟吾子美以一酒食之過至廢爲民而流落以死此其可以歎息流涕而爲當世仁人君子之職位宜與國家樂育賢才者惜也子美之齒少於予而予學古文反在其後天聖之間予舉進士於有司見時學者務以言語聲偶摘裂號爲時文以相誇尙而子美獨與其兄才翁及穆參軍伯長作爲古歌詩雜文時人頗共非笑之而子美不顧也其後天子患時文之弊下詔書諷勉學者以近古由是其風漸息而學者稍趨於古焉獨子美爲於舉世不爲之時其始終自守不牽世俗趨舍可謂特立之士也子美官至大理評事集賢校理而廢後爲湖州長史以卒享年四十有一其狀貌奇偉望之昂然而卽之溫溫久而愈可愛慕其才雖高而人亦不甚嫉忌其擊而去之者意不在子美也賴天子聰明仁聖凡當時所指名而排斥二三大臣而不欲以子美爲根而累之者皆蒙保全今並列

於榮寵雖與子美同時飲酒得罪之人多一時之豪俊亦被收采進
顯於朝廷而子美獨不幸死矣豈非其命也悲夫廬陵歐陽修序

宋史本傳

蘇舜欽字子美參知政事易簡之孫父耆有才名嘗爲工部郎中直集賢院舜欽少慷慨有大志狀貌傀偉當天聖中學者爲文多病偶對獨舜欽與河南穆修好爲古文歌詩一時豪俊多從之游初以父任補太廟齋郎調滎陽縣尉玉清昭應宮災舜欽年二十一詣登聞鼓上火疏

文載集中不錄

會有詔戒越職言事又上書

文載集中不錄

尋舉進士改

光祿寺主簿知長垣縣遷大理評事監在京店宅務康定中河東地震舜欽詣匭通疏極陳災變異常時政得失纚纚千餘言無所回避

文載集中不錄

羣小爲之側目范仲淹薦其才召試爲集賢校理監進奏院

舜欽娶宰相杜衍女衍時與范仲淹富弼在政府多引用一時聞人欲更張庶事御史中丞王拱辰等不便其所爲會進奏院祀神舜欽與右班殿直劉巽輒用鬻故紙公錢召妓樂閒多會賓客拱辰廉得之諷其屬魚周詢等劾奏因欲搖動衍事下開封府劾治於是舜欽

與巽俱坐自盜除名同時會者皆知名士因緣得罪逐出四方者十
餘人世以爲過薄而拱辰等方自喜曰吾一舉網盡矣舜欽旣放廢
寓于吳中其友人韓維責以世居京師而去離都下隔絕親交舜欽
以書報之文載集
中不錄二年得湖州長史卒舜欽數上書論朝廷事在蘇
州買水石作滄浪亭益讀書時發憤懣於歌詩其體豪放往往驚人
善草書每酣酒落筆爭爲人所傳及謫死世尤惜之妻杜氏有賢行
兄舜元字才翁爲人精悍任氣節爲歌詩亦豪健尤善草書官至尙
書度支員外郎三司度支判官

蘇學士文集總目

商丘漫堂先生宋 犖鑒定

卷第一

古詩二十四首

感興三首

慶州敗

及第後與同年宴李丞相宅

昇陽殿故址

大霧

藍田悟真寺作

興慶池

長安春日效東野

太行道

對酒

夜中

蜀士

己卯冬大寒有感

獵狐篇

難易言二首

大小言

了語不了語二首

舟中感懷寄館中諸君

送李生

卷第二

古詩二十首

楊子江觀風浪

哭曼卿

吾聞

送安素處士高文悅

贈釋祕演

城南感懷呈永叔

吳越大旱

中秋夜吳江亭上對月懷前宰及寄君謨蔡大

越州雲門寺

和韓三謁歐陽九之作

城南歸值大風雪

出京後舟中有作寄文韓二兄弟永叔歐陽九和叔杜二

寄富彥國

大風

檢書

雜興

呂公初示古詩一編因以短歌答之

老萊子

往王順山值暴雨雷霆

卷第三

古詩二十首

依韻和勝之暑飲

答宋太祝見贈

送李冀州詩

和鄰幾登繇臺塔

依韻和伯鎮中秋見月九日遇雨之作

夜聞秋聲感而成詠同鄰幾作